

l'è “circondato dalla catena dei monti Bigiè” (pag. 200). Inte quèllo do De Simoni i “Bigiè” són missi tra Mórta e a còlla de Mórta (pag. 162) e gh'è, a pag. 134, 'na fotografia ch'a ne móstra a pàrte setentrionàle. Pariéiva che se pòsse dì che i Bigiæ vàn da-a còlla de Mórta a-o rilièvo ch'o s'atrèuva sòrvia a gèxa de Bòrzoï, ma fòscia l'è 'n pò tròppo.

In sciâ crènn-a ch'a chinn-a a levànte da-a quòta 624.4, da crèsta Ròcca di Cröi, a 600 mètri circa d'artèssa in sciò livèllo do mà, gh'è l'asòsto di Bigiæ.

L'asòsto o servìva a-i contadin de Mórta che anàvan inte comunàgge pe tagià l'èrba ò pe chéugge légnna, pe mètise a redòsso quànde gh'èa brùtto témpo. E-e dònne ò e figgie de Mórta che montàvan a portà da mangià a-i òmmi, gh'è o lasciàvan drénto.

L'asòsto o l'è in monuménto stòrico ùnico pe beléssa, grandéssa e strutûa – poéi za constatàlo da-e fotografie – pe-o quæ ò presentòu 'na domànda de 'n recùpero lèggo a-o comùn de Zèna e con l'agiùtto da squàddra da Protezione civìle da Porçéivia, missa a dispoziçión da-o Municipio, e de 'na brancà de voluntài de Mórta e do CAI Bòsanæo, stémmo za louàndo pe arvì o sentè che da-a Cavàlla de Mórta o mónta a l'asòsto. Da l'òtùnno pròscimo pensémmo de portàghe za in gîta e schèue; se pöi se credià ch'a ségge 'na còsa bónn-a, l'anno pròscimo poriéiva òrganizàghe 'na gîta anche pe A Compagna, magàra precedûa da 'na conferenza.



Particolàre do fumaieu de l'asòsto.



Anàndo aprèuvo a-e órme do caprióllo.



L'asòsto di Bigiæ.

